

Erich Bolinius

E-Mail: Erich.Bolinus@t-online.de

**(Bericht über den BSV Kickers Emden - Sendung „Flutlicht“ auf Radio Ostfriesland
Donnerstag, 26.1.2012 18.05 Uhr** auf 94.0 bzw. 87,7)

Moin, leev Toehörers,

dat was güstern ja 'n goed Naricht. Dat Amtsgericht Auerk hett dat Insolvenzverfahren open maakt. Dormit kann de Spölbedriev van Kickers Emden in de Oberliga Neddersassen wieder gahn. Wall kann Kickers Emden keen Punkten mehr winnen, aber dorför de Spölen. Dat dat mögelk is, is dorup toerüggtoeföhren, dat de Richter an dat Amtsgericht Ulrich Kötting, he was maal Vörsitter van de Sportverein Auerk, seggt hett, dat dat Befinnen (Gutachten) faststellt hett, dat de Vereen neet in de Laag is, wat toe betahlen un ok heel un dall overskuld is. Aber dat is noch genug Masse dor, um de Kösten för dat Verfahren toe decken. Dormit is vörrutsett, dat dat Verfahren open maakt worden kann. De Insolvenzverwalter Axel Gebers hett mitdeelt, dat de Skülden van Kickers Emden rund dree Millionen Euro bedragen. Dat is keen Pappensteel! Man Gebers meent, dat dat up de Dürte de Vereen saneert worden kann.

Kickers Emden hett upstünns 15 Spölers för de 1. Mannskupp. Dree Spölers, **Sven Rodow** und **Markus Dirks** van BW Borssum un **Dennis Ahrens** van WT Loppersum hebben van hör Vereen de Freeigaav neet kregen. Ik finn dat is würrelk skaa. De Spölers könt nu 'n halv Jahr neet spölen. Wat hebben de Verenen dorvan, fraag ik mi. Mag ok eeniges van Kickerssied skeev lopen wesen, man de Vörsitters van de beid Verenen sullten ok an de Jungs denken. Kickers Trainer Uwe Groothuis, see, dat de dree Spölers aber bi Kickers wieder mittraineeren doent. Dat finn ik heel moi. Könt se doch dann, wenn dat all so word, as man sük dat denkt, in de komende Saison in de Landesliga för Kickers Emden uplopen.

Of nu Saterdag tegen Osterholz-Scharmbeck um Klock 2 in de Oostfreesen-Stadion spölt word, is noch neet klaar, so as man hört. De Platz is froren, un dat kann för de Spölers gefahrelk worden. Wachten wi also of, of spölt worden kann. Blot so nebenbi, de Osterholzers denken dorover na, of se ok ut de Oberliga utscheiden, nadem de Steuerfahnders bi hör up Besök west sünd. Dann wassen dat mit Nordhorn un Kickers all dree Mannskuppen, de sük ut de Liga verofskeden doen. Ik fraag mi, wor sall dat noch henföhren?

Ik bün aber blied, dat de Foetballspöleree bold weer losgeiht. An leevsten was mi, wenn Saterdag spölt worden kunn. Wenn wall, dann weten wi ok eenigermaten, wor de Mannskupp van Kickers Emden steiht.

Drücken wi all toesamen de Dumen, dat Kickers, wenn spölt word, Saterdag winnt un dat de Saison toe Enn spölt worden kann.

Bevör ik, so as alltied, toe Schluss noch 'n kört Foetballwitz vertell, much ik mien Ü60-Mannskupp van SV Petjem, besünners aber Ali Bloem, de nu in 't Auto sitt, un immer toehört, hartelk gröten.

Nu de kört Witz

Lehrerin: "Heiko, nöhm mi dree berühmte Mannlü, de mit B anfangen."

Heiko: "Ballack, Basler, Beckenbauer!"

Lehrerin: "Heest Du noch noit war van Bach, Brecht of Brahms hört?"

Heiko: "Ersatzspölers interesseeren mi neet!"

So leev Toehörers van Radio Oostfreesland,

ik hoop, Joe hett dat Plattdütsk gefallen, denn mien Motto heet ja alltied, plattdütsk dürt nettso as Kickers Emden – neet unnergahn.

Bit anner Maal

Joe
Erich Bolinius ut Emden-Petjem.